

TOLOSA / Uztaileko lehenengo asterako zabalik egongo da Usabalgo solarium berria

Haurrentzako jolastokia, liburutegia eta Wi-Fi sistema izango ditu zonaldeak, besteak beste.

Iñigo Terradillos

Usabal kiroldegiko lanen hirugarren fasearen lehen pausoa amaitzear dago, beraz, laster izango da erabilgarri solarium berria, hemendik bi astera, hain zuzen. Oscar Renedo kirol zinegotziak lan hauen berri eman zuen atzo, eta atzeratzearen arrazoiak ere aipatu zituen: Azken asteetako eguraldi txarra dela-eta asko atzeratu dira lanak, bestela dagoeneko inauguratuta egongo litzateke; garraiolarien grebak ere eragina izan du. Hala, astelehenean ekarriko dute belar artifiziala jartzeko materiala, eta 5 egunetan jarrita egongo da, ondorioz, uztaileko lehenengo asterako erabilgarri izango da. Usabal kiroldegia ia 4.000 m² gehiago izango ditu solarium berriarekin. Hau udan erabili ahal izango da funtzio honetarako, baina urteko gainerako sasoian futbol zelai moduan erabili ahalko da, futbol 7rako, hain zuzen.

Aisirako aukera anitza

Zonalde berri honek aukera ugari eskainiko dizkie erabiltzaileei. Batetik gaztetxoentzat jolastokia jarriko dute; honek barku forma izango du, eta kulunkak eta txirrista izango dute haurrek jolasteko, azaldu zuen Renedok. Bestalde, igerileku liburutegia ere solarium berria zabaltzearekin batera jarriko dute martxan, eta irailaren 23ra arte erabili ahalko da, 15:00etatik 19:00etara. Udal Liburutegiak eskainiko du zerbitzua, eta liburuak hartu hartu ahalko ditu erabiltzaileak kiroldegian dagoen unerako, hau da, bertatik ateratzean utzi beharko ditu. Halaber, Wi-Fi sistema ere jarriko dute, beraz, ordenagailu eramangarria eraman nahi dutenek sarerako konexioa izango dute.

Solarium berriarekin batera, Usabalera sartzeko beste sarrera ere erantsiko dute. Hala, zuzenean zonalde berri honetara sartu ahalko da, sarrera nagusitik pasa gabe. Sarrera berri honetan bizikletak aparkatzeko lekua ere jarriko dute.

2011 urtera bitarteko asmoak

Hirugarren fasearen lehen pausoa besterik ez da izango solarium berria, oraindik ere beste hainbat proiektu burutzeko baitaude fase horretan. Horien artean dago eskalada-murruarena; dagoeneko onartua dago, eta datorren urtearen hasierarako erabiltzeko moduan egongo dela espero dute. Horretaz gain, padel, patinaje, skate eta tenis zonaldeak ere jartzeko asmoa dute.

Berazubiko instalazioak berritzea eta Usabalgoekin bateratzea da beste asmoetako bat. Modu honetan, erabiltzaileek bi instalazioak erabiltzeko aukera izango lukete, biak Udalak eta Kirolzer-ek kudeatuko bailituzke, baina oraindik erabat adostu gabe dute proiektu hau.

2011ra bitarte kirolarekin loturiko egitasmoen artean Zerkausiaren inguruan egin nahi duten presa dago. Aukera ugari eskainiko du amaiturik dagoenean, eta uraren kolektorea jarrita dagoenean, ur garbiarekin askoz ere gehiago oraindik, azaldu zuen Renedok. 2008-2011 urteetako kirol inbertsioetarako 4.300.000 euro beharko dituela aurreikusi du Udalak. Segurtasun neurriak handitu

Azken aldian bai kiroldegi barruan bai eta kanpoaldean autoetan-eta izan diren lapurreta salaketak direla-eta segurtasun neurriak hartu dituztela ere azaldu zuen atzo Oscar Renedo zinegotziak. Zaintze sistema handituko dugu, hau da, kanpora begirako nahiz barruko segurtasun kamera gehiago jarriko ditugu; Usabalen bertan kontrolatzeaz gain, kamera hauek Udaltzaingoan ere kontrolatzen dituzte. Horretarako 31.000 euroko inbertsioa egingo duela Udalak gehitu zuen.